

**Regional News Unit AIR Aizawl
Thursday, October 03, 2024**

Time - 7:30 -7:40Hrs

REGIONAL NEWS BULLETIN

HEADLINES (MORNING)

- **Governor Pu Indra Sena Reddy Nallu chuan nimin khan Aizawl khawpui bawlhhlawh sawngbawlna Tuiriala Solid Management Centre a tlawh.**
- **Sorkar laipui chuan khuarel chhياتna hrang hranga hman atan Mizoram chu cheng vaibelchhe 21 leh nuai 60 a pe.**
- **Manipur-a Naga khaw pahnih mipuite inkara inbeihna thlengah mi pathum an thi a, mi 40 chuangin hliam an tuar.**
- **Prime Minsiter Narendra Modia chuan nimin khan Jharkhand-a Hazaribagh ah hmasawna hna hrang rhang cheng vaibelchhe 83000 hu hawna leh lungphum phumna hun a hman.**



GOVERNOR

Governor Pu Indra Sena Reddy Nallu chuan nimin khan Tuiriala Solid Management Centre (SWMC), Tuirial tlawhin hmalakna hrang hrang a enfiah a, hemi kaihhnawih department hotute a kawm.

Governor Pu Indra Sena Reddy Nallu chuan khawpui thang zelah hnawm a pun chak avangin a nih dan tur ang taka hnawm lakkhawmte sawngbawl a tul thu a sawi a. Hmasawna ruhrel lian leh pawimawh tak takte enkawlzui leh tuaihnum kawngah tanrual a tul thu sawiin, harsatna a awm a nih pawhin kan zavaia kan ngaihven tlan a tul a ni, a ti bawk.

Solid Waste Management Centre Tuirial hi Urban Development and Poverty Alleviation department hnuaiia State Investment Programme Management and Implementation Unit (SIPMIU) hmalaknaa North East Capital Cities Development Implementation Programme (NERCCDIP) hmanga sak niin kum 2019 khan hawn a ni a, kum 2022 khan AMC kutah hlan a ni.

AMC tarlan danin Aizawl khawpui chhunga hnawm sakhatte Pathianni tih loh kar tluana phurh luha sawngbawl thin a ni a, hemi tur hian AMC chuan thawktu 35 a ruai a ni. Nitin hnawm paih truck 190 vel te'n bawlhhlawh Ton 119.42 vel zet SWMC Tuirialah hian an chung khawm thin a; heng zinga Ton 89.09 hi bawlhhlawh hnawng (wet waste) niin, adang Ton 30.33 hi bawlhhlawh ro (dry waste) a ni. Hengte hi sawngbawl niin, nitin dry waste Ton 7.98 vel hi hmannawn (recycle) leh theih turin AMC pawmpui scrap dealer 11 te hnenah hralh thin a ni a, wet waste-te hi Mechanical Compost Plant hmangin kumin March thla atang khan leithaah chantir zel an ni.



H1N1 OUTBREAK

Tlungvel khua a tlang hrileng, khawsik, khuh leh hritlang avanga sample 43 an lak endik zingah mi 32 te chu H1N1 hri kai an ni tih hmuhchhuah a ni.

Health & Family Welfare hotute hnen atanga thudawn danin Tlungvel khua-ah hian September ni 17 leh ni 28 inkar chhung khan hritlang khawsik leh khuh vei mi 245 chu Tlungvel health & wellness centre-ah an inentir a. Hetiang a nih avang hian Tlungvel khua hi 'hri lenna khua' a puan a ni a. Thawhtanni khan Thingsulthliah Primary Health Centre (PHC) a laboratory technician chu tirin mi 43 sample a la a. Hei hi Thawhlejni khan Aizawl lamah thawn thla-in Zoram Medical College-ah endik a ni a. Sample 43 zinga 32-te chu hritlang chi khat H1N1 kai an ni tih finfiah a ni a. H1N1 hi 'influenza 'A' virus' ti-in an sawi a, sawi dan thenkhatah chuan 'swine flu' an ti bawk a ni. Doctor-te chuan hritlang kaite hi ngaihtuahawm leh na tak an awm lo niin an sawi a, mi 245 zinga a tam zawk hi dam tawhin mi 70 vel erawh chuan an hritlang leh khuh a la dam chiang lo niin an sawi.

Hemi hma September ni 25 khan 'Chana Pawl' ti a sawite chenna Chhuanthar Tlangnuam khua-ah pawh hritlang khawsik a damlo hi mi 233 vel an awm a. An zinga mi 35-te sample endikna-ah an vai hian H1N1 hritlang natna an vei tih hmuhchhuah a ni tawh bawk.

Mithiamte chuan H1N1 hi natna inkaichhawn awlsam tak a ni chungin hlauhawm lutuk a nih loh thu an sawi a. Tlungvel-ah hian gospel camping an buatsaihna-ah a darh ni a hriat a ni a. Kar leh lama Presbytery inkhawmpui an thlen leh dawn avangin inkaidarh lo tura fimkhur a tul hle a an hriat thu an sawi a. Chhuanthar Tlangnuam khua-ah hian sikul atanga inkaidarh an ni a hriat a ni bawk.



SDRF

Sorkar laipui Ministry of Home Affairs chuan State Disaster Relief Fund (SDRF) leh National Disaster Relief Fund (NDRF atangin Mizoram tan cheng vaibelchhe 21 leh nuai 60 a rawn pe chhuak.

MHA thuchhuahin a tarlan danin SDRF leh NDRF atanga sum lo pek lawk hi furpui tuar state 14 te tanpuina tur a ni a. A vai chuan cheng vaibelchhe 5,858 leh nuai 60 a ni a. Pek chhuah zinga Mizoram chan tur hi cheng vaibelchhe 21 leh nuai 60 a ni. Kumin Cyclone Remal-in Mizoram a nuai hnu khan sorkar laipui atanga chhawm dawlna tur hi Mizoram sorkar chuan cheng vaibelchhe 237 leh nuai 60 zet June thla laihawl vel khan a dil a ni.



MYANMAR REFUGEES

Kar hmasa chhung khan Myanmar atangin Mizoramah raltlan 679 an lo luh belh niin home department hotute chuan an sawi.

Home department hotute sawi dan chuan Myanmar atanga lo luh belh mi 679 te hi an vaiin Saitual district-ah dah an ni a. Hemi hma lam hian Saitual district-ah relief camp a awm lova, tunah chuan relief camp 3 siamin chutah chuan mi 89 an awm ta a, relief camp pawna an chhungkhat laina leh thian thate bel bakah mahni in luah leh mi hnuai a thawka awm chilh nghal mi 227 awm thin chu mi 587-in rawn belhin mi 814 an tling ta a ni.

Raltlan lut thar zinga mi 210 hi mipa an ni a, 247 hi hmeichhia niin naupang 222 an awm bawk. Heti hian a hma a Myanmar raltlan 227 awmna thin Saitual district-ah hian mi 906 an awm ta a ni. Tun dinhmunah hian mipa 274, hmeichhia 306 leh naupang 326 an awm ta tihna a ni.

Heti hian Mizorama sahimna zawnga lo lut Myanmar raltlan hi tun dinhmunah mi 33,712 an awm mek niin sorkar chuan a chhinchhiah a ni a. An zinga mi 16,704-te hi relief camp 132-ah an awm mek a, mi 17,005-te chuan laina leh thiante an belh bakah mi in luahte an ni a. An zinga mi 10,119 hi mipa an ni a, hmeichhia 10,782 leh naupang 12,811 an awm bawk a ni.

Hetih lai hian September ni 21 hma lam, mi 679-te an rawn luh belh hma chawlhkarah khan Mizorama Myanmar raltlan awm mekte hi an tlem sawt a. Mi 928 in an tlem a, Siaha district atanga chhuak mi 921 leh Mamit district atanga chhuak 7 te an ni a. Khawi-ah nge an kal a, Myanmar ramah an let leh nge tih home department hotute chuan an hre lo.



CLEANLINESS WEEK CLOSED

Faina lama beihpui thlak kal mek chu nimin tuk khan Lawngtlai DC Conference Hall-ah Adviser to Chief Minister (Health) Dr.Lorrain Lalpekliana Chinzah hovin khar a ni.

Lawngtlai a Faina Hapta kharna ah hian Dr.Lorrain Lalpekliana Chinzah chuan faina chu chhunzawm zel ngai a nih vangin tha thlah lova nasa zawka hmalazui turin Sorkar Department, Zirlai naupang leh mipui a sawm. Hapta kharna ah hian khawpui leh thingtlang lama faina lama hmalakna kalpui dan kimchang takin kalkhawmte hrilhhriat an ni a, hapta hman chhungin kawng hrang hrangin hmalak niin, Thingphun leh Plastic bawlhhlawh thenfai leh bawlhhlawh chhekkhawlna hmun thenfaite, Faina lama intiamkamna neihte chu hmalakna langsar zingah a tel.

Lunglei district-ah chuan Convention Center-ah faina beihpui thlak kharna inkhawm hi buatsaih a ni a. Hetah hian Lunglei Bawrhsap Pu R. Lalthazuala chu khuallian a ni a, SBM(G) leh SBM(U) report ngaihthlak a ni in hemi puala thuziak lawmman sem a ni bawk.

Serchhipah chuan Bawrhsap Pu Paul L.Khuma chuan nimina Serchhip District faina beihpui thlak kharna inkhawmah thusawiin faina beihpui chu nitin, kartin, leh kumtluana hman a nih tur thu a sawi bakah faina chu mahni theuhva bultan a pawimawh thu a sawi bawk.

Khawzawl a faina beihpui thlak kharna inkhawmah Bawrhsap Pu K. Vanlalthiana chuan Faina leh hriselna chu a inkungkaih tlat thu leh hrisel tur chuan khawtlang bakah in leh lo pawh vawn fai a ngaih thu a sawi a, faina chuan Khawzawl district a tih hmasawn ngei a beisei thu a sawi bawk.

Mamit-ah pawh Faina Beihpui thlakna kharna hun hi hman a ni a, he huna thusawitu District Bawrhsap Pu Jacob Lalawmpuia chuan sawrkar department pisa, zirna In leh khawtlang anga hmalakna-ah theihtawp chhuah a ni tih mit ngeia hmuh theiha a awm thu leh hemi atana kawng an sah kuak tawh chu chhunzawm a District fai ber ni reng thei tura mahni theihna zawn theuha hmalak chhunzawm zel turin kalkhawmte a sawm bawk.

Nimin a Kolasib DC Conference Hall-a faina beihpui thlak kharna inkhawmah District Bawrhsap Pu Robert C Lalmangaiha chuan faina kawnga hmalakna chu a tawpna tur a nih loh thu leh Kolasib District chu khawtlang fai, veng fai leh chhungkaw fai an nih theihna tura a bul tanna chauh a nih thu a sawiin chu chu Swachhata Hi Seva in a tum ber a ni a ti.



BLOOD DONATION

Ministry of Health & Family Welfare leh National Blood Transfusion Council buatsaih India hmarchhak state zinga a thlawna thisen pe tha ber lawmman chu Mizoram-in a dawng.

Thawhlejni, National Voluntary Blood Donation Day pual a Rajasthan khawpui Jaipur-a India Blood Donation NGO Conclave buatsaih-ah lawman pakhatna hi Mizoram aiawhin Dr Vanlallawma Khiangte, Lunglei Civil Hospital-chuan a dawng a, Mizoram-in lawman a dawn hi thisen pek leh lak chungchanga state-a thuneitu State Blood Transfusion Council hminga kaltir a ni.



CM-HOSPITAL

Chief Minister Pu Lalduhoma chuan Serchhip District Hospital tur sa mektu contractor chu a hna chhunzawm zel turin a hrilh.

Nimin tuk khan Pu Lalduhoma chuan Serchhip PWD IB ah Serchhip khawtlang hruaitute a kawm a. Serchhip District Hospital sak hna tan tawh, a sak phung tur her danglam deuh vanga Corporate Social Responsibility (CSR) sum petu Power Grid Corporation of India Limited (PGCIL) ngaichanga contractor-in chawlhsan rih a tum chu thlamuang taka hna chhunzawm tura a hrilh thu a sawi. Chief Minister hian Health Minister phone-a biain a chah a ni.

Chief Minister chuan, PGCIL ten CSR an rawn pek hi cheng vaibelchhe 21 a ni a. Chuta cheng vaibelchhe 18 chu a building sakna tur a ni a, a bak zawng chu hmanrua (equipment) leina tur a ni. Mahse, district hospital changtlung tak sak na'n pawisa dah belh a tul avangin Serchhip Hospital atan hian North East Special Infrastructure Development Scheme - other than road infrastructure (NESIDS OTRI) atangin cheng vaibelchhe 65 dah belh tum a ni a. Hei hi NESIDS OTRI inkaihhraina siam angin cheng vaibelchhe 50 bak hospital atan dah theih a nih loh avangin cheng vaibelchhe 50 dah a ni ta a ni. Hei vang hian Serchhip hospital sak phung tur hi thlak hlek (change of scope) a lo tul ta a. PGCIL lam hian rem an rawn ti ang em tih contractor hian han ngaihchan deuh a tum a ni.

Hemi chungchangah hian Chief Minister chuan, PGCIL lam ngaichanga hun lo khawh ral hi a uiawm tawh avangin sum pek tul awm apiang hi NESIDS OTRI atanga lo pek mai theih a ni a. Contractor hian thlamuang takin hna lo chhunzawm se a duh thu a sawi a. A tul chuan sum hi an dap belh zel dawn niin a sawi a ni.



MANIPUR NAGA CLASHED

Manipur-a Naga khaw pahnih mipuite inkara inbeihna thlengah mi pathum an thi a, mi 40 chuangin hliam an tuar. Thudawn danin inbeihna hi Ukhurul district-a thleng a ni a, Hungphun leh Hungpung thingtlang khaw mite chu Ukhurul Market chhunga Viewland Baptist Church leh Punjab National Bank inkarah silaiin an inkap a. Heng khuaa chengte sawidanin buaina intanna hi khaw ramri inchuh vang a ni . Nimin tlai thleng khan inkahna hi a thleng a ni. Police te sawidanin mitthi zinga pakhat hi 6th Manipur Rifles mi leh sa a ni a. State sawrkar chuan internet leh mobile data te chu darkar 24 chhung Ukhurul district-ah hian a titawp nghal a. Venhimna kengkawh tur sipai thahnem tak dahluh belh a ni bawk.

Hetihlai hian Ukhrol leh Kamjong district huamchhunga MLA pathumte chuan thuchhuah intawm siamin buaina siamtute chu insum tur leh remna kawng siam turin an ngen a. Kohhran pawl hrang hrang leh Naga civil society te pawhin pawl pahnihte chu tharum thawh tawh lo turin an ngen bawk a ni.

◁◁◁◁

PM

Prime Minsiter Narendra Modia chuan nimin khan Jharkhand-a Hazaribagh ah hmasawna hna hrang rhang cheng vaibelchhe 83000 hu hawna leh lungphum phumna hun a hmang. Thusawiin PM Modia chuan project hrang hrang an neihte chuan tribal te mi khawsak phunga tichangkang dawn a, thingtlang lama hmasawna ruhrelte pawh tihchangtlun zel a ni a ti.

(Audio)

Ramchhunga tribalte chawikan an nih loh chuan ramin hma a sawn thei lo tih sawiin ramchanga India siam tumna pawh a hlawhtling thei lo a ti bawk.

Nimina Prime Minister-in project a hawn te hi Cheng vaibelchhe 79,150 senna tur Dharti Aaba Janjatiya Gram Utkarsh Abhiyan leh Pradhan Mantri Janjati Adivasi Nyaya Maha Abhiyan (PM-JANMAN) hnuaia project te a ni a. Heng bakah hian Eklavya school 40 a hawn bakah school dang 25 dinna tur lungphum a phum bawk a ni.

◁◁◁◁